



Godina XXII - Broj 11

ZENICA, petak, 29.09.2017.god.

SKUPŠTINA

336.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 47. sjednici, održanoj dana 20.09.2017. godine, donosi

ZAKON O NAUČNOISTRAŽIVAČKOJ DJELATNOSTI

DIO PRVI - OSNOVNE ODREDBE

Član 1. (Predmet Zakona)

Ovim zakonom utvrđuje se poseban interes Zeničko-dobojskog kantona (u daljem tekstu: Kanton) u oblasti nauke i tehnologije, osnovni principi naučnoistraživačke djelatnosti, finansiranje naučno-istraživačke djelatnosti, način izrade i sadržaj Strategije razvoja naučno-istraživačke djelatnosti, formiranje Vijeća za nauku Kantona, nosioci naučnoistraživačke djelatnosti i postupak osnivanja naučnoistraživačkog instituta, organi naučno-istraživačkog instituta, naučnoistraživačko osoblje, nadzor nad provedbom ovog zakona, obaveze nadležnih organa u oblasti naučnoistraživačke djelatnosti i druga pitanja od značaja za obavljanje naučnoistraživačke djelatnosti na području Kantona.

Član 2. (Gramatička terminologija)

Gramatička terminologija korištenja muškog i ženskog roda za pojmove korištene u ovom zakonu uključuje oba roda.

Član 3. (Definicija naučnoistraživačke djelatnosti)

Naučnoistraživačka djelatnost predstavlja sistematski stvaralački rad na usvajanju novih znanja s ciljem podizanja općeg civilizacijskog nivoa društva i korištenje

tih znanja u svim oblastima društvenog i privrednog razvoja, uključujući i razvoj nauke i tehnologije i njihovu primjenu.

Član 4. (Poseban interes za Kanton i ostvarivanje posebnog interesa)

- (1) Naučnoistraživačka djelatnost je od posebnog društvenog interesa za Kanton.
- (2) Poseban interes i strateški ciljevi u naučnoistraživačkoj djelatnosti na području Kantona, u smislu ovog zakona, ostvaruju se putem:
 - a) stvaranja mogućnosti za intenzivni i usklađeni razvoj nauke i tehnologije;
 - b) stvaranja uslova za podsticanje naučnoistraživačke djelatnosti koji je u funkciji tehnološkog, inovacionog i ukupnog društveno-ekonomskog razvoja;
 - c) usmjeravanje društva ka inovacijama i podizanjem opšteg nivoa tehnologija u privredi i obezbjeđivanje konkurentnosti robe i usluga na domaćem i svjetskom tržištu;
 - d) podsticanje pronalazaštva, inovacija i zaštita intelektualnog vlasništva;
 - e) utvrđivanja osnovnih principa koordinacije naučno-istraživačke djelatnosti;
 - f) povezivanja planova razvoja naučnoistraživačke djelatnosti sa strategijom razvoja privrednih kapaciteta;
 - g) međunarodne naučne saradnje;
 - h) školovanja i usavršavanja novih generacija naučnika na visokoškolskim ustanovama u Kantonu, Bosni i Hercegovini ili inozemstvu;
 - i) ostvarivanja saradnje naučnoistraživačkih i visokoškolskih ustanova s odgojno-obrazovnim ustanovama i ustanovama iz oblasti kulture;

- j) unapređenja sistema naučno - tehnoloških informacija;
- k) razvoja istraživačke infrastrukture prema međunarodnim standardima;
- l) reinvestiranja u industrijsko istraživanje;
- m) realizacije naučnoistraživačkih programa u skladu sa Strategijom razvoja naučnoistraživačke djelatnosti Kantona i Bosne i Hercegovine;
- n) provođenja aktivnosti na popularizaciji nauke i naučnoistraživačke djelatnosti.

Član 5. (Principi)

- (1) Naučnoistraživačka djelatnost zasniva se na principu povezanosti osnovnih, primijenjenih i razvojnih istraživanja, osposobljavanja i usavršavanja kadra za naučnoistraživačku djelatnost.
- (2) Naučnoistraživačka djelatnost u Kantonu zasniva se na sljedećim principima:
 - a) slobodi i autonomiji stvaralaštva;
 - b) širenju i produblivanju naučnih saznanja;
 - c) konkurentnosti naučnih programa i projekata;
 - d) primjeni međunarodnih standarda i međunarodnih mjerila kvaliteta u oblasti nauke;
 - e) decentraliziranom uređenju i policentričnom organiziranju u oblasti nauke;
 - f) javnosti rada i rezultata tog rada koji su podložni naučnoj i stručnoj kritici;
 - g) etičnosti naučnoistraživačkog osoblja;
 - h) saradnji s domaćim i međunarodnim institucijama u oblasti nauke i istraživanja;
 - i) povezanosti sa sistemom visokog obrazovanja i odgojno-obrazovnim ustanovama na svim nivoima;
 - j) zaštiti intelektualnog vlasništva, ljudskih prava, te lične i opće sigurnosti;
 - k) brizi za održivi razvoj i zaštitu okoliša;
 - l) potrebama privrednog i društvenog razvoja;
 - m) poticanju i uvažavanju specifičnih sadržaja od značaja za Kanton i Bosnu i Hercegovinu,
 - n) povećanju efikasnosti naučnoistraživačke djelatnosti.

Član 6. (Sloboda naučnoistraživačke djelatnosti i oblasti djelovanja)

- (1) Naučnoistraživačka djelatnost ne podliježe nikakvim ograničenjima ili formalnim zahtjevima osim onih koji proizilaze iz poštivanja standarda i etičnosti u naučnoistraživačkoj djelatnosti, zaštite ljudskih prava, zaštite lične i opće sigurnosti na radu, kao i zaštite okoliša.
- (2) Naučnoistraživačka djelatnost realizuje se u oblasti: prirodnih nauka, inženjeringa i tehnologije, medicinskih i zdravstvenih, poljoprivrednih, društvenih i humanističkih nauka, kao i interdisciplinarnih istraživanja.

Član 7. (Rezultat naučnoistraživačke djelatnosti)

- (1) Naučni i tehnološki razvoj ima prioritetan značaj za razvoj Kantona i sastavni je dio međunarodnog, posebno evropskog naučnoistraživačkog prostora.
- (2) Rezultati naučnoistraživačke djelatnosti mogu biti:
 - a) naučni i stručni rad objavljen u referentnom naučnom časopisu;
 - b) naučna knjiga ili monografija;
 - c) originalni naučni ili pregledni članak;
 - d) naučni elaborat i izvještaj,
 - e) saopštenje ili rad objavljen u zborniku s naučnog skupa;
 - f) pozivno predavanje na naučnom skupu;
 - g) objavljena naučna kritika ili polemika;
 - h) leksikografska ili enciklopedijska jedinica;
 - i) kartografska publikacija;
 - j) magistarski i doktorski rad;
 - k) nova sorta, patent, tehnička rješenja, nove metode, novi materijali te novi tehnološki postu-pak.
- (3) Rezultati naučnoistraživačke djelatnosti treba da sadrže elemente izvrsnosti i inovacija, tj. novih spoznaja i novih primjena, a vrednuju se objavljivanjem u naučnim publikacijama ili provjerom u praksi.

- #### **Član 8. (Ostvarivanje naučnoistraživačke djelatnosti)**
- (1) Naučnoistraživačka djelatnost obuhvata i ostvaruje se povezivanjem osnovnog, primjenjenog i razvojnog

istraživanja te osposobljavanjem kadra za obavljanje naučnoistraživačke djelatnosti.

- (2) Osnovno istraživanje podrazumijeva teorijski i eksperimentalni rad usmjeren ka novim spoznajama radi dobijanja naučno primjenjivih istraživanja s dugoročnim ciljevima primjene.
- (3) Primjenjeno istraživanje je stvaralački rad usmjeren ka dobijanju naučno primjenjivih rezultata.
- (4) Razvojno (stručno) istraživanje, je stvaralački rad zasnovan na znanjima i rezultatima stečenim osnovnim ili primijenjenim istraživanjima, odnosno praktičnom iskustvu, koji je, prije svega, usmjeren na uvođenje novih ili znatno poboljšanje postojećih postupaka, proizvoda i usluga.
- (5) Osposobljavanje kadra za obavljanje naučnoistraživačke djelatnosti, u smislu ovog zakona, podrazumijeva podršku i stvaranje uslova za sticanje akademskih i naučnoistraživačkih zvanja odnosno sticanje novih i proširivanje stečenih znanja.
- (6) Naučnoistraživačku infrastrukturu čine objekti i oprema za obavljanje naučnoistraživačke djelatnosti (laboratorije, postrojenja, ispitne stanice, biblioteke, naučno izdavaštvo i drugo).

Član 9.

(Osiguranje finansijskih sredstava za naučnoistraživačku djelatnost)

- (1) Sredstva za podršku naučnoistraživačkoj djelatnosti osiguravaju se u godišnjem iznosu od naj-manje 0,5% budžeta Kantona.
- (2) Finansiranje naučnoistraživačke djelatnosti obezbjeđuje se i iz drugih izvora, odnosno:
 - a) intelektualnih usluga;
 - b) od prihoda ostvarenih prodajom proizvoda specifičnih zahtjeva i laboratorijskih usluga;
 - c) donacija, sponzorstava;
 - d) projekata i ugovora s domaćim i stranim istraživačkim ustanovama i od konsultantskih aktivnosti, neformalnog obrazovanja i certificiranja osoba traženih i deficitarnih zani-manja;
 - e) sredstava privrednih društava, ustanova i udruženja;
 - f) sredstava apliciranja na sredstva domaćih i međunarodnih fondova.

(3) Sredstva iz stava (1) ovog člana biće utrošena u skladu sa Strategijom razvoja naučnoistraživačke djelatnosti, očuvanje i razvoj ukupnih naučnoistraživačkih potencijala (naučnoistraživačke infrastrukture, opreme i naučnoistraživačkih kadrova) te poticanje naučnoistraživačkih i istraživačko-razvojnih projekata koji se realiziraju u saradnji s privredom i u međunarodnoj saradnji, a 5% od ovih sredstava namijenjena su za podršku projektima koji su od posebnog interesa za Kanton.

(4) Nacrt odluke o utvrđivanju kriterija za utrošak sredstava utvrđuje Vijeće za nauku na osnovu kojeg ministar izrađuje prijedlog odluke i dostavlja Vladi Zeničko-dobojskog kantona na usva-janje (u daljem tekstu: Vlada Kantona).

(5) Za namjene iz stava (3) ovog člana sredstva se, u skladu s odlukom iz stava (4) ovog člana dodjeljuju u postupku javnog oglašavanja od strane Ministarstva za obrazovanje, nauku, kulturu i sport (u daljem tekstu: Ministarstvo).

Član 10.

(Nagrada za naučna dostignuća)

- (1) Skupština Kantona može dodjeljivati kantonalnu nagradu za značajne rezultate u naučnoistraživačkoj djelatnosti.
- (2) Broj i visina nagrada, način predlaganja, kriteriji i postupak dodjele nagrada utvrđuju se posebnom odlukom Skupštine Kantona.

DIO DRUGI - STRATEGIJA RAZVOJA NAUČNOISTRAŽIVAČKE DJELATNOSTI

Član 11.

(Izrada i sadržaj Strategije razvoja naučnoistraživačke djelatnosti)

- (1) U svrhu ostvarivanja strateških ciljeva, definiranja smjernica i prioriteta naučnog i tehnološkog razvoja Kantona i Bosne i Hercegovine, odnosno ostvarivanja posebnog interesa u naučno-istraživačkoj djelatnosti, donosi se i provodi Strategija razvoja naučnoistraživačke djelatnosti.
- (2) Strategija razvoja naučnoistraživačke djelatnosti se usaglašava sa Strategijom razvoja Kantona i strateškim dokumentima na nivou Bosne i Hercegovine i Federacije Bosne i Hercegovine.

- (3) Strategija razvoja naučnoistraživačke djelatnosti predstavlja osnovu za podsticanje i realizaciju naučnoistraživačke i istraživačko-razvojne djelatnosti u Kantonu i donosi se svakih pet godina.
- (4) Strategija za razvoj nauke sadrži osnovne principe, ciljeve, smjernice i prioritete naučnog i teh-nološkog razvoja, s posebnim osvrtom na:
- a) ciljeve koji se u ovoj oblasti žele dostići na nivou Kantona;
 - b) naučne oblasti, polja i grane/uže oblasti koje treba posebno razvijati i materijalno podrža-vati radi dostizanja ciljeva u razvoju Kantona i Bosne i Hercegovine;
 - c) prioritete potrebe u naučnoistraživačkoj djela-tnosti i prioriteti ulaganja u naučnoistraži-vačke i istraživačko-razvojne projekte u narednom petogodišnjem periodu;
 - d) definiranje časopisa i publikacija čije je izdavanje od posebnog interesa za Kanton;
 - e) program podrške za naučnoistraživačku infra-strukturu;
 - f) program podrške za osposobljavanje kadra za naučnoistraživačku i istraživačko-razvojnu djela-tnost i za usavršavanje naučnika od interesa za Kanton;
 - g) ostale odrednice koje su od značaja u kreiranju strategije i politike u nauci i naučnoistra-živačkoj djelatnosti (period ažuriranja i redefini-ranja ciljeva koji se žele doseći u narednom petogodišnjem periodu, program razvoja sistema naučnih infor-macija i objavljivanja dostignuća naučnoistraži-vačke djelatnosti, program učešća u međunarodnim naučnoistraži-vačkim i istraživačko-razvojnim projektima i drugo).

Član 12.

(Izrada i usvajanje Strategije razvoja naučnoistraživačke djelatnosti)

- (1) Nacrt Strategije razvoja naučnoistraživačke djelatnosti izrađuje Vijeće za nauku i dostavlja ga Ministarstvu.
- (2) Strategiju razvoja naučnoistraživačke djelatnosti donosi Skupština Kantona Zeničko-dobojskog kantona (u daljem tekstu: Skupština Kantona) na prijedlog Vlade Kantona.

DIO TREĆI - VIJEĆE ZA NAUKU

Član 13.

(Osnivanje i rad Vijeća za nauku)

- (1) S ciljem praćenja i unapređenja stanja u oblasti nauke i tehnologije u Kantonu osniva se Vijeće za nauku kao stalno, savjetodavno stručno tijelo Ministarstva.
- (2) Vijeće za nauku podnosi izvještaj o svom radu i stanju u oblasti naučnoistraživačke djelatnosti Vladi Kantona jednom godišnje.
- (3) Ministarstvo može od Vijeća za nauku zatražiti dostavu određenih informacija ili stavova s prijedlogom mjera za unapređenje stanja u oblasti naučnoistraživačke djelatnosti.

Član 14.

(Imenovanje Vijeća za nauku)

- (1) Članove Vijeća za nauku imenuje Vlada Kantona na prijedlog Ministarstva iz reda istaknutih naučnika koji se biraju u skladu sa Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, broj 12/03, 34/03 i 65/13).
- (2) Predsjednika i zamjenika predsjednika Vijeća za nauku biraju članovi Vijeća na izbornoj sjed-nici.
- (3) Vijeće se sastoji od sedam članova i to:
 - a) šest članova istaknutih naučnika s akreditovane visokoškolske ustanove ili naučnih insti-tuta, pri čemu se treba voditi računa o zastupljenosti temeljnih naučnih oblasti;
 - b) jedan član iz reda istaknutih inovatora s područja Kantona koji je upisan u Registar istraži-vačkih djelatnosti u Zeničko-dobojskom kantonu (u daljem tekstu *Registar*).
- (4) Za predsjednika Vijeća za nauku imenuje se kandidat u zvanju naučnog savjetnika ili redovnog profesora.
- (5) Mandat zamjenika predsjednika prati mandat predsjednika Vijeća za nauku.
- (6) Članovi Vijeća za nauku imenuju se na period od četiri godine, uz mogućnost još jednog ime-novanja.
- (7) Član Vijeća za nauku ne može biti rektor univerziteta, dekan organizacione jedinice univerzi-teta, direktor organizacione jedinice univerzi-teta, direktor naučnoistraživačkog instituta i direktor visoke škole.

- (8) Poslovníkom o radu utvrđuje se način rada, sazivanje sjednica, odlučivanje i druga pitanja bitna za rad Vijeća za nauku.
- (9) Administrativne poslove za potrebe Vijeća za nauku obavlja sektor za oblast visokog obrazova-nja i nauke u sastavu Ministarstva.

Član 15.

(Naknada za rad Vijeća za nauku)

- (1) Članovi Vijeća za nauku imaju pravo na naknadu u zavisnosti od provedenih aktivnosti i ostva-renih rezultata na realizaciji poslova iz nadležnosti Vijeća za nauku.
- (2) Rješenje o iznosu naknade donosi Vlada Kantona.

Član 16.

(Nadležnosti Vijeća za nauku)

Vijeće za nauku je nadležno da:

- a) daje preporuke i mišljenja s ciljem razvoja, finansiranja i unapređenja stanja u oblasti nau-ke i tehnologije u Kantonu;
- b) izrađuje Nacrt Strategije razvoja naučnoistraživačke djelatnosti;
- c) prati provođenje Strategije razvoja naučnoistraživačke djelatnosti u Kantonu i daje prepo-ruke i mišljenja Ministarstvu prilikom donošenja provedbenih akata (akcioni planovi, smjernice i sl.);
- d) daje mišljenje o međusobnoj povezanosti Strategije razvoja naučnoistraživačke djelatnosti u Kantonu i Strategije razvoja visokog obrazovanja Kantona i potrebi njihovog usklađi-vanja;
- e) vrši procjenu stanja u oblasti naučnoistraživačke djelatnosti i oblasti visokog obrazovanja te daje preporuke ministru u pogledu preduzimanja mjera i aktivnosti za unapređenje stanja u oblasti nauke i visokog obrazovanja u Kantonu;
- f) daje mišljenje u vezi sa strateškim pravcima budućeg rada i djelovanja visokoškolskih ustanova u oblasti naučnoistraživačke djelatnosti i visokog obrazovanja;
- g) predlaže Ministarstvu aktivnosti u oblasti naučnoistraživačke djelatnosti i visokog obrazo-vanja;
- h) priprema i po zahtjevu ministra izrađuje nacрте strateških dokumenata i podzakonskih aka-ta u oblasti nauke;

- i) priprema i Ministarstvu predlaže instrumente za statističko praćenje stanja u oblasti nauke i tehnologije u Kantonu;
- j) daje preporuke o učešću Kantona u programima Evropske unije iz oblasti nauke i tehnolo-gije;
- k) daje preporuke u pogledu podrške projektima u oblasti nauke i tehnologije od posebnog interesa za Kanton;
- l) daje mišljenje u vezi s ostvarivanjem međunarodne saradnje u oblasti nauke i tehnologije;
- m) daje preporuke u pogledu definiranja sistema naučnoistraživačkih informacija u skladu s međunarodnim standardima;

Član 17.

(Prijevremeno razrješenje)

- (1) Vlada može razriješiti člana Vijeća za nauku i prije isteka vremena na koje je imenovan, i to:
- a) u slučaju gubitka sposobnosti za izvršavanje obaveza člana Vijeća za nauku;
 - b) ako uredno i savjesno ne ispunjava obaveze člana Vijeća za nauku;
 - c) ako svojim djelovanjem i ponašanjem povrijedi ugled Vijeća za nauku;
 - d) na vlastiti zahtjev.
- (2) Obrazloženi prijedlog za utvrđivanje postojanja okolnosti za razrješenje člana Vijeća za nauku ministru može podnijeti predsjednik ili tri člana.
- (3) Utvrđivanje postojanja okolnosti za razrješenje člana Vijeća za nauku može pokrenuti i ministar.

DIO ČETVRTI - NOSIOCI NAUČNOISTRAŽIVAČKE DJELATNOSTI I POSTUPAK OSNIVANJA NAUČNOISTRAŽIVAČKOG INSTITUTA

Član 18.

(Nosioци naučnoistraživačke djelatnosti)

- (1) Naučnoistraživačku djelatnost na području Kantona obavljaju:
- a) akreditovane visokoškolske ustanove kao ustanove s organizacionim jedinicama registro-vane na području Kantona;
 - b) naučnoistraživački instituti kao ustanove registrovani na području Kantona;

c) akademsko, naučnoistraživačko osoblje i inovatori upisani u *Registar*.

(2) Na naučnoistraživačke institucije primjenjuju se opći propisi o ustanovama, ako ovim zakonom nije drugačije propisano.

Član 19.

(Osnivač naučnoistraživačkog instituta)

(1) Naučnoistraživački institut može osnovati domaće odnosno strano pravno i fizičko lice, u svim oblicima svojine, u skladu sa zakonom.

(2) Naučnoistraživački institut mogu osnovati dva ili više osnivača, u kom slučaju se njihova međusobna prava, obaveze i odgovornosti utvrđuju ugovorom koji se zaključuje u pisanoj formi.

(3) Naučnoistraživački institut kao javnu ustanovu može osnovati Skupština Kantona, samostalno ili zajedno sa fizičkim ili pravnim licima, na prijedlog Vlade Kantona.

Član 20.

(Postupak osnivanja)

(1) Postupak osnivanja naučnoistraživačkih instituta kao organizacionih jedinica u okviru visoko-školske ustanove na području Kantona obavlja se na način i u postupku propisanim Zakonom o visokom obrazovanju.

(2) Postupak osnivanja naučnoistraživačkih instituta kao ustanova vrši se na način propisan ovim zakonom.

(3) Uslovi za osnivanje naučnoistraživačkog instituta iz stavova (1) i (2) ovog člana, propisani su ovim zakonom.

(4) Osnivač naučnoistraživačkog instituta kao ustanove Ministarstvu podnosi zahtjev za osnivanje, uz koji obavezno prilaže elaborat o opravdanosti osnivanja.

(5) Elaborat o opravdanosti osnivanja naučnoistraživačkog instituta obavezno sadrži: podatke o osnivaču, sjedište i naziv, strateške ciljeve, opis i preciznu razradu djelatnosti, strateški program naučnih istraživanja, plan organizacijskog razvoja, kadrovsku i infrastrukturnu opremljenost i izvore finansiranja i finansijski plan.

(6) U postupku osnivanja naučnoistraživačkog instituta kao ustanove podnosilac zahtjeva je obavezan ispred zvaničnog naziva instituta dodati odrednicu „Naučnoistraživački institut“.

Član 21.

(Elaborat o opravdanosti osnivanja naučnoistraživačkog instituta)

(1) Vlada Kantona za javnu ustanovu, odnosno osnivač naučnoistraživačkog instituta, formira ekspertnu komisiju koja će pripremiti elaborat o opravdanosti osnivanja naučnoistraživačkog instituta.

(2) Članovi ekspertne komisije su iz naučne oblasti za koju se osniva naučnoistraživački institut.

(3) Elaborat sadrži dokaze o opravdanosti osnivanja naučnoistraživačkog instituta, kao i dokaze da su ispunjeni propisani uslovi za osnivanje i rad naučnoistraživačkog instituta.

(4) Elaborat se podnosi Ministarstvu sa zahtjevom za donošenje rješenja o ispunjenosti uslova za početak rada.

Član 22.

(Odluka Skupštine i rad komisije matičara)

(1) Odluka Skupštine Kantona, po zahtjevu za osnivanje javne ustanove, ili odluka Ministarstva, po zahtjevu za osnivanje privatne ustanove mora biti donesena najkasnije u roku od šest mjeseci od dana podnošenja Ministarstvu urednog zahtjeva iz člana 20. stav (4) ovog zakona.

(2) Odluka Skupštine Kantona ili odluka Ministarstva iz stava (1) ovog člana je konačna i putem Ministarstva dostavlja se osnivaču.

(3) Nakon što Skupština Kantona ili Ministarstvo donese odluku kojom se daje saglasnost za osnivanje naučnoistraživačkog instituta kao ustanove, osnivač imenuje komisiju matičara, čiji sastav treba biti u skladu s odredbama ovog zakona koje se odnose na izbor u naučna i istraživačka zvanja, koja obavlja sljedeće poslove:

a) donosi statut;

b) objavljuje konkurs i vrši izbor u naučna i istraživačka zvanja u skladu sa zakonom;

c) objavljuje konkurs za izbor direktora;

d) objavljuje konkurs i vrši izbor članova upravnog odbora naučnoistraživačkog instituta kao ustanove;

e) preduzima ostale potrebne aktivnosti u procesu ispunjavanja uslova neophodnih za početak rada i daljnji rad naučnoistraživačkog instituta kao ustanove;

- f) dostavlja osnivaču izvještaj o ispunjenosti uslova potrebnih za početak rada i daljnji rad naučnoistraživačkog instituta kao ustanove s obrazloženim kalendarom aktivnosti i datumom početka rada.
- (4) Nakon što komisija matičara dostavi izvještaj da je izvršila zadatke iz stava (3) ovog člana, osnivač donosi akt o osnivanju naučnoistraživačkog instituta kao ustanove.
- (4) Stručna komisija razmatra zahtjev, procjenjuje dokaze i na licu mjesta vrši provjeru ispunjenosti uslova propisanih ovim zakonom i pravilnikom iz stava (7) ovog člana.
- (5) Nakon što stručna komisija provede postupak u skladu s rješenjem o imenovanju, podnosi izvještaj o svom radu ministru s mišljenjem o ispunjenosti propisanih uslova za početak rada.

Član 23.

(Provjera ispunjenosti uslova od strane stručne komisije)

- (1) Uz zahtjev za provjeru ispunjenosti uslova za početak rada osnivač naučnoistraživačkog instituta kao ustanove Ministarstvu dostavlja:
- odluku Skupštine Kantona za javnu ustanovu, odnosno odluku Ministarstva za privatnu ustanovu o davanju saglasnosti na elaborat o opravdanosti osnivanja naučnoistraživačkog instituta;
 - odluku osnivača o osnivanju naučnoistraživačkog instituta kao ustanove;
 - usvojen statut;
 - dokaz da ima najmanje deset zaposlenika iz reda naučnoistraživačkog osoblja od kojih najmanje 30% zaposlenika sa stepenom doktora nauka i izborom u zvanje iz odgovarajuće naučne oblasti i najmanje 30% zaposlenika sa stepenom magistra i izborom u zvanje iz odgovarajuće naučne oblasti;
 - dokaz da su izvršeni izbori u naučna i istraživačka zvanja u skladu s ovim zakonom i statutom;
 - dokaz da je osnivač obezbijedio prostor, opremu i sredstva u skladu s podnesenim elaboratom;
 - dokaz o uplati sredstava za troškove rada stručne komisije.
- (2) Ispunjenost uslova provjerava se kod osnivanja naučnoistraživačkih instituta kao organizacione jedinice u okviru visokoškolske ustanove i kod osnivanja naučnoistraživačkog instituta kao ustanove.
- (3) Po prijemu zahtjeva, Ministarstvo imenuje članove stručne komisije za provjeru ispunjenosti uslova za početak rada naučnoistraživačkog instituta kao ustanove, koja broji najmanje pet članova, i to tri iz reda istaknutih naučnika i stručnjaka iz odgovarajuće oblasti sadržane u elaboratu, jednog predstavnika osnivača naučnoistraživačkog instituta kao ustanove te jednog inspektora za oblast obrazovanja i nauke, (u daljem tekstu: Inspekcija), iz Ministarstva.

- (6) Na osnovu rješenja o ispunjenosti uslova za početak rada, koje donosi ministar, novoosnovani naučnoistraživački institut kao ustanova upisuje se u *Registar*.
- (7) Postupak upisa i brisanja iz Registra, kao i ostala pitanja bitna za postupak osnivanja i daljnji rad naučnoistraživačkog instituta kao ustanove uredit će se posebnim pravilnikom koji donosi Ministarstvo.

Član 24.

(Registar istraživačkih djelatnosti u Zeničko-dobojskom kantonu)

- (1) Registar sadrži podatke o:
- naučnicima, istraživačima i inovatorima;
 - naučnoistraživačkim organizacijama;
 - naučnoistraživačkim projektima;
 - infrastrukturnim ulaganjima u nauku u kantonu.
- (2) Način vođenja Registra uređuje Ministarstvo.

DIO PETI – ORGANI NAUČNOISTRAŽIVAČKOG INSTITUTA

Član 25.

(Organi naučnoistraživačkog instituta)

- (1) Organi naučnoistraživačkog instituta kao ustanove su: upravni odbor i direktor.
- (2) Stručni organ naučnoistraživačkog instituta jeste naučno vijeće.
- (3) Naučnoistraživački institut može imati i druge stručne organe za vođenje poslovanja ili nad-zorne organe, čije se osnivanje, sastav i nadležnosti uređuju osnivačkim aktom i statutom.
- (4) Organi naučnoistraživačkih instituta kao organizacionih jedinica u okviru visokoškolske ustanove na području Kantona propisani su Zakonom o visokom obrazovanju.

Član 26.
(Upravni odbor)

Organ upravljanja naučnoistraživačkim institutom kao ustanovom je Upravni odbor.

Član 27.
(Sastav, broj i mandat)

- (1) Upravni odbor naučnoistraživačkog instituta kao javne ustanove ima pet članova i čine ga predstavnici akademskog i neakademskog osoblja.
- (2) Upravni odbor naučnoistraživačkog instituta kao javne ustanove imenuje Vlada Kantona a čine ga tri člana iz reda osnivača koji se biraju u skladu sa Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, broj 12/03, 34/03 i 65/13) i dva člana, koje predlaže naučno vijeće, iz reda istraživača zaposlenih u institutu.
- (3) Statutom se bliže utvrđuje sastav i broj članova upravnog odbora privatne naučnoistraživačke ustanove, te način njihovog izbora, odnosno imenovanja i razrješenja.
- (4) Mandat članova upravnog odbora je četiri godine.
- (5) Članovima upravnog odbora naučnoistraživačkog instituta pripada naknada za rad u upravnom odboru u visini koju utvrdi osnivač.

Član 28.
(Djelokrug upravnog odbora)

Upravni odbor obavlja poslove utvrđene zakonom, aktom o osnivanju i statutom naučnoistraživačkog instituta, a naročito:

- a) donosi statut naučnoistraživačkog instituta, donosi akt kojim se utvrđuje način obračuna plaća i drugih primanja u javnom naučnoistraživačkom institutu te donosi opći akt o unutrašnjoj organizaciji i sistematizaciji radnih mjesta, kao i druge opće akte u skladu sa zakonom i statutom naučnoistraživačkog instituta;
- b) utvrđuje planove finansiranja i razvoja;
- c) donosi godišnji program rada naučnoistraživačkog instituta na prijedlog naučnog vijeća;
- d) imenuje i razrješava direktora naučnoistraživačkog instituta na obrazloženi prijedlog naučnog vijeća;
- e) usmjerava, kontrolira i ocjenjuje rad direktora u domenu finansijskog poslovanja;

- f) odlučuje o korištenju sredstava za rad u skladu sa statutom;
- g) odgovara osnivaču za rezultate rada naučnoistraživačkog instituta;
- h) odlučuje o prigovoru zaposlenika na odluke organa naučnoistraživačkog instituta koji su u prvom stepenu odlučivali o pravima, obavezama i odgovornostima zaposlenika iz radnog odnosa;
- i) najmanje jednom godišnje podnosi osnivaču izvještaj o poslovanju naučnoistraživačkog instituta;
- j) obavlja i druge poslove u skladu sa zakonom, aktom o osnivanju i statutom.

Član 29.
(Direktor naučnoistraživačkog instituta)

- (1) Direktor naučnoistraživačkog instituta je organ rukovođenja institutom.
- (2) Direktora instituta nakon provedene procedure javnog konkursa, bira naučno vijeće naučno-istraživačkog instituta, i u formi obrazloženog prijedloga, uz prethodnu saglasnost osnivača, dostavlja Upravnom odboru na konačno imenovanje.
- (3) Direktor instituta bira se na mandatni period od četiri godine uz mogućnost još jednog izbora.
- (4) Isto lice može biti imenovano za direktora na dva uzastopna mandata.
- (5) Uslovi i postupak izbora direktora naučnoistraživačkog instituta uređuju se statutom naučno-istraživačkog instituta u skladu sa zakonom.

Član 30.
(Naučno vijeće)

- (1) Naučnoistraživački institut ima naučno vijeće kao stručni organ.
- (2) Naučno vijeće čine svi naučnici i određeni broj istraživača tog naučnoistraživačkog instituta, kao i određeni broj lica sa stepenom doktora nauka, koji imaju izbor u naučno zvanje, a koji nisu zaposlenici u tom naučnoistraživačkom institutu.
- (3) Statutom se uređuje sastav i broj članova naučnog vijeća, način njihovog izbora, odnosno imenovanja i razrješenja.

Član 31.
(Zadaci Naučnog vijeća)

Naučno vijeće, kao stručni organ:

- a) Priprema i utvrđuje programe naučnoistraživačke djelatnosti i prati njihovo ostvarivanje;
- b) Utvrđuje naučnoistraživačke projekte, određuje voditelje projekata, daje odgovarajuće smjernice, prati njihovu izradu i ocjenjuje kvalitet ostvarenih projekata;
- c) Vršiti izbor u naučna i istraživačka zvanja;
- d) Predlaže Upravnom odboru izbor i razrješenje direktora naučnoistraživačkog instituta;
- e) Vodi brigu o osposobljavanju kadra za naučnoistraživačku djelatnost i o usavršavanju naučnika;
- f) Vodi brigu o nabavci i održavanju naučnoistraživačke infrastrukture;
- g) Razmatra, odlučuje i daje mišljenje o drugim naučnim i stručnim pitanjima, u skladu s taštutom.

DIO ŠESTI - NAUČNOISTRAŽIVAČKO OSOBLJE

Član 32.

(Naučnici, istraživači i inovatori)

- (1) Naučnik je lice izabrano u naučno zvanje, pod uslovima i po postupku utvrđenom ovim zakonom, kao i lice izabrano u akademsko zvanje docenta, vanrednog profesora i redovnog profesora dodijeljeno shodno odredbama Zakona o visokom obrazovanju.
- (2) Istraživač je lice izabrano u istraživačko zvanje pod uslovima i na način utvrđen ovim zakonom, kao i lice izabrano u saradničko zvanje dodijeljeno shodno odredbama Zakona o visokom obrazovanju.
- (3) Inovator je lice koje je primjenom inventivnog pristupa rješavanju problema stvorilo jednu ili više inovacija, a koje su patentirane kod Instituta za intelektualno vlasništvo BiH ili u paten-tnom uredu neke druge države.

Član 33.

(Naučna i istraživačka zvanja)

- (1) Naučna zvanja u smislu ovog zakona su:
 - a) naučni savjetnik;
 - b) viši naučni saradnik;
 - c) naučni saradnik.

(2) Istraživačka zvanja u smislu ovog zakona su:

- a) istraživač savjetnik;
- b) viši istraživač saradnik;
- c) istraživač saradnik;

(3) Ukoliko se na visokoškolskoj ustanovi ukaže potreba za sudjelovanjem naučnoistraživačkog osoblja koje je izabrano na osnovu ovog zakona u realizaciji nastavnog procesa i sudjelovanju u radu komisija, tim licima se za vrijeme trajanja angažmana, bez priznavanja naučnonastavnog zvanja kao akademskog zvanja koje je dodijeljeno shodno odredbama Zakona o visokom obrazovanju, priznaje samo uživanje prava članova akademskog osoblja u vezi s izvođenjem nastavnog procesa odnosno rada u komisiji, i to:

- a) istraživaču saradniku priznaju se prava asistenta;
- b) višem istraživaču saradniku priznaju se prava višeg asistenta;
- c) istraživaču savjetniku priznaju se prava višeg asistenta;
- d) naučnom saradniku priznaju se prava docenta;
- e) višem naučnom saradniku priznaju se prava vanrednog profesora;
- f) naučnom savjetniku priznaju se prava redovnog profesora.

(4) Za vrijeme sudjelovanja u realizaciji nastavnog procesa naučnoistraživačko osoblje ne stiče akademsko zvanje.

Član 34.

(Minimalni uslovi za izbor u naučna i istraživačka zvanja)

- (1) Minimalni uslovi za izbor u naučna i istraživačka zvanja su:
 - a) za *istraživača saradnika*: završen stepen prvog ciklusa, s najmanje 240 ECTS bodova i ostvarena najniža prosječna ocjena 8,0 (osam) ili 3,5 (tri i po);
 - b) za *višeg istraživača saradnika*: završen stepen drugog ciklusa (magisterij), s najmanje 300 ECTS bodova i ostvarena najniža prosječna ocjena 8,0 (osam) ili 3,5 (tri i po) na oba ciklusa studija;
 - c) za *istraživača savjetnika*: završen stepen drugog ciklusa (magisterij), s najmanje 300 ECTS bodova i ostvarena najniža prosječna ocjena 8,0 (osam) ili 3,5 (tri i po) na oba ciklusa studija, objavljena najmanje 3 (tri) recenzirana naučna rada iz odgovarajuće oblasti;

- d) za *naučnog saradnika*: naučni stepen doktora nauka u odgovarajućoj naučnoj oblasti, minimum kvantitativnih uslova za odgovarajuću naučnu grupaciju predviđenih Pravilni-kom o minimalnim uslovima za izbor u naučna zvanja;
- e) za *višeg naučnog saradnika*: proveden najmanje jedan izborni period u zvanju naučnog saradnika u odgovarajućoj naučnoj oblasti, minimum kvantitativnih uslova za odgovara-juću naučnu grupaciju predviđenih Pravilnikom o minimalnim uslovima za izbor u naučna zvanja;
- f) za *naučnog savjetnika*: proveden najmanje jedan izborni period u zvanju višeg naučnog saradnika u odgovarajućoj naučnoj oblasti, minimum kvantitativnih uslova za odgovaraju-ću naučnu grupaciju predviđenih Pravilnikom o minimalnim uslovima za izbor u naučna zvanja.
- (2) Pravilnik o minimalnim uslovima za izbor u naučna zvanja donosi Ministarstvo, u skladu s Uputstvom o metodološkom okviru i principima za izradu Pravilnika o minimalnim uslovima za izbor u naučna zvanja („Službeni glasnik BiH“, broj: 47/12).

Član 35.

(Oduzimanje zvanja)

- (1) Naučnoistraživačko zvanje može biti oduzeto ako se dokaže da je lažno ili na temelju falsifika-ta naveden neki od uslova za izbor.
- (2) O oduzimanju naučnoistraživačkog zvanja odluku donosi senat visokoškolske ustanove na prijedlog naučnog vijeća organizacione jedinice, ili naučno vijeće.
- (3) Prijedlog za pokretanje postupka za oduzimanje naučnoistraživačkog zvanja može pokrenuti direktor ili naučno vijeće.
- (4) Nakon prijema prijedloga za pokretanje postupka za oduzimanje naučnoistraživačkog zvanja naučno vijeće organizacione jedinice odnosno naučno vijeće naučnoistraživačkog instituta kao ustanove imenuje komisiju od pet članova u istom ili višem zvanju u odnosu na zvanje kandi-data koji je predmet postupka za oduzimanje naučnoistraživačkog zvanja.
- (5) U komisiju ne mogu biti imenovani članovi komisije koji su bili članovi komisije u postupku u kojem je lice, protiv kojeg je pokrenut postupak, steklo naučnoistraživačko zvanje.
- (6) Komisija provjerava osnovanost tvrdnji odnosno navoda iznesenih u prijedlogu za pokretanje postupka za oduzimanje naučnoistraživačkog zvanja i pisani izvještaj dostavlja direktoru.
- (7) Direktor u roku od sedam dana, dostavlja izvještaj komisije predlagatelju postupka i licu protiv kojeg je pokrenut postupak na izjašnjenje u roku od sedam dana od dana prijema izvještaja.
- (8) Nakon isteka roka, direktor saziva sjednicu naučnog vijeća najkasnije u roku od 30 dana od dostave odgovora predlagatelja pokretanja postupka i lica protiv kojeg je pokrenut postupak radi utvrđivanja prijedloga za oduzimanje naučnoistraživačkog zvanja.
- (9) Na sjednicu naučnog vijeća se pozivaju predlagatelj i lice protiv kojeg je pokrenut postupak.
- (10) Naučno vijeće razmatra sve predložene dokaze i odlučuje o postojanju osnova za oduzimanje naučnoistraživačkog zvanja.
- (11) Ako vijeće odluči da postoji osnova za oduzimanje naučnoistraživačkog zvanja, ono podnosi prijedlog o oduzimanju naučnoistraživačkog zvanja senatu visokoškolske ustanove odnosno odluku ukoliko se radi o naučnoistraživačkom institutu kao ustanovi, u roku od 7 dana od dana održavanja sjednice vijeća.
- (12) Protiv odluke senata odnosno naučnog vijeća o oduzimanju naučnoistraživačkog zvanja nije dozvoljena žalba, ali se protiv iste može pokrenuti postupak pred nadležnim sudom.
- (13) Oduzimanjem naučnoistraživačkog zvanja gube se sva prava koja su stečena osporenim izbo-rom u naučnoistraživačko zvanje.

Član 36.

(Izbor u naučna i istraživačka zvanja)

Izbor naučnoistraživačkog osoblja u naučna i istraživačka zvanja u organizacionoj jedinici u okviru visokoškolske ustanove i u naučnoistraživačkom institutu kao ustanovi vrši se javnim konkursom, u skladu s kriterijima utvrđenim ovim zakonom, statutom i pravilnikom, kojim se utvrđuju općeprih-vaćeni standardi u datoj oblasti, a koji donosi ministar.

Član 37.

(Period izbora i statusna pitanja)

- (1) Naučnoistraživačko osoblje bira se na određeni izborni period, i to:

- a) *istraživač saradnik* na period od četiri godine bez mogućnosti ponovnog izbora;
- b) *viši istraživač saradnik* na period od pet godina s mogućnošću jednog ponovnog izbora;
- c) *istraživač savjetnik* na period od pet godina s mogućnošću jednog ponovnog izbora;
- d) *naučni saradnik* na period od pet godina s mogućnošću jednog ponovnog izbora;
- e) *viši naučni saradnik* na period od šest godina s mogućnošću jednog ponovnog izbora;
- f) *naučni savjetnik* trajno.

(2) Član naučnoistraživačkog osoblja zaključuje ugovor o radu na period na koji je izabran, osim naučnog savjetnika, koji zaključuje ugovor o radu na neodređeno vrijeme.

(3) Nakon isteka izbornog perioda visokoškolska ustanova i naučnoistraživački institut kao ustanova obavezni su zaključiti novi ugovor o radu sa svakim članom naučnoistraživačkog osoblja koji je izabran u isto ili više naučno ili istraživačko zvanje.

(4) Rokovi za izbor u isto ili više zvanje naučnoistraživačkog osoblja produžit će se za vrijeme provedeno na porodiljskom odsustvu, bolovanju dužem od šest mjeseci, javnoj dužnosti ili iz drugih opravdanih razloga, u skladu sa zakonom, a što se preciznije utvrđuje statutom visokoškolske ustanove i naučnoistraživačkog instituta kao ustanove.

(5) Visokoškolska ustanova odnosno organizaciona jedinica i naučnoistraživački institut kao ustanova u roku od šest mjeseci od dana stupanja na snagu ovog zakona obavezni su donijeti program mjera za stvaranje uslova za napredovanje naučnoistraživačkog osoblja, kao i plan kadrovskih potreba za naredni petogodišnji period.

(6) Plan iz stava (5) ovog člana visokoškolska ustanova i naučnoistraživački institut kao ustanova, obavezni su dostaviti Ministarstvu odmah po njegovoj izradi, a izvještaj o provođenju programa iz stava (5) ovog člana na početku svake kalendarske godine.

(7) Član naučnoistraživačkog osoblja koji navršši 65 godina života i ispuni zakonske uslove za prestanak radnog odnosa ne može na osnovu konkursa biti biran u isto ili više zvanje.

Član 38.

(Istek izbornog perioda i ugovor o radu)

Kada član naučnoistraživačkog osoblja nakon isteka izbornog perioda ne bude izabran u isto ili više zvanje, visokoškolska ustanova odnosno organizaciona jedinica i naučnoistraživački institut kao ustanova mogu, prije otkazivanja ugovora o radu, ponuditi članu naučnoistraživačkog osoblja zaključivanje novog ugovora o radu na poslovima za koje se ne traži izbor u naučnoistraživačko zvanje, ako za to postoji mogućnost i potreba, a što se preciznije definira statutom visokoškolske ustanove, odnosno naučnoistraživačkog instituta kao ustanove.

DIO SEDMI – NADZOR

Član 39.

(Nadzor nad provođenjem Zakona)

(1) Nadzor nad provođenjem ovog zakona i propisa donesenih na osnovu ovog zakona vrši Ministarstvo.

(2) Ispunjenost propisanih uslova vrši Ministarstvo svakih pet godina po proceduri koja je propisana ovim zakonom.

(3) Odgovorna tijela naučnoistraživačkog instituta kao organizacione jedinice ili ustanove obavezna su na zahtjev Ministarstva u zahtijevanom roku dostaviti sve tražene informacije i dokumente potrebne za izvršavanje nadležnosti.

Član 40.

(Inspeksijski nadzor)

Inspeksijski nadzor nad provođenjem ovog zakona, provedbenih propisa, kao i akata i odluka organa naučnoistraživačkog instituta kao organizacione jedinice ili ustanove, donesenih u cilju izvršenja obaveza utvrđenih ovim zakonom vrši Inspektorat za obrazovanje i nauku.

Član 41.

(Čuvanje i arhiviranje naučne građe)

Sva naučna građa se obrađuje, čuva i održava u skladu sa Zakonom o arhivskoj građi Federacije BiH („Službene novine Federacije BiH“, broj: 45/02).

DIO OSMI - KAZNE NE ODREDBE

Član 42.

(Kazne za prekršaje)

(1) Novčanom kaznom u iznosu od 1.000 KM do 5.000 KM kaznit će se za prekršaj naučnoistraživački institut kao organizaciona jedinica ili ustanova, ako:

- a) izvrši izbor direktora suprotno uslovima ili proceduri koja je propisana ovim zakonom (član 29.);
- b) dodjeljuje naučna i istraživačka zvanja ili vrši izbor naučnoistraživačkog osoblja koje ne ispunjava uslove za izbor propisane ovim zakonom i provedbenim propisima (član 34.);
- c) zaključi ugovor o radu s članom naučnoistraživačkog osoblja suprotno ovom zakonu (član 38.);
- d) ne izvrši naloženu upravnu mjeru u roku i na način kako je naloženo rješenjem nadležne inspekcije (član 40.).
- (2) Novčanom kaznom u iznosu od 500 KM do 3.000 KM kaznit će se za prekršaj odgovorno lice naučnoistraživačkog instituta kao organizacione jedinice ili ustanove:
- a) za prekršaje iz stava (1) ovog člana;
- b) ako ne osigura da se propisane radnje u postupku izbora naučnoistraživačkog osoblja provedu u rokovima propisanim ovim zakonom (član 34.).
- (5) Nakon isteka izbornog perioda u naučno ili istraživačko zvanje koje je izvršeno prije stupanja na snagu ovog zakona, izbor u isto ili više zvanje vršit će se prema odredbama ovog zakona.
- (6) Naučnoistraživačko osoblje koje je birano u zvanje prema odredbama zakona koji stupanjem na snagu ovog zakona prestaje da važi, a koje se nalazi u prvom izbornom periodu ima pravo nakon isteka izbornog perioda ostati u tom zvanju i to bez provođenja konkursne procedure najduže za vremenski period koji je za to zvanje propisan ovim zakonom.
- (7) Nakon isteka izbornog perioda u slučaju iz stava (6) ovog člana, procedura izbora u naučno-istraživačko zvanje se provodi prema odredbama ovog zakona.
- (8) Ministarstvo će u roku od 30 dana od dana stupanja na snagu ovog zakona donijeti pravilnik iz čl. 23. stav (7).
- (9) Postupak provjere ispunjenosti uslova iz člana 23. stav (1) ovog zakona za institute koji su osnovani prije stupanja na snagu ovog zakona Ministarstvo provodi nakon proteka roka od tri godine od dana stupanja na snagu ovog zakona.

DIO DEVETI – PRIJELAZNE I ZAVRŠNE ODREDBE

Član 43.

(Implementacijske mjere i nastavak rada)

- (1) Vijeće za nauku će pripremiti nacrt Strategije razvoja naučnoistraživačke djelatnosti te će ga dostaviti Ministarstvu radi upućivanja Vladi Kantona, najkasnije u roku od devet mjeseci od dana imenovanja.
- (2) Osnivanje naučnoistraživačkih instituta kao ustanova vršit će se u skladu s ovim zakonom i Strategijom razvoja naučnoistraživačke djelatnosti.
- (3) Postupci osnivanja kao i druge statusne promjene započete prema odredbama propisa koji su važili prije stupanja na snagu ovog zakona završit će se prema tim propisima.
- (4) Postupak izbora u naučna i istraživačka zvanja koja su započeta prema odredbama propisa koji su važili prije stupanja na snagu ovog zakona završit će se prema tim propisima.

Član 44.

(Prestanak primjene)

Danom stupanja na snagu ovog zakona prestaje da važi Zakon o naučnoistraživačkoj djelatnosti („Službene novine Zeničko-dobojskog kantona“, broj: 03/99).

Član 45.

(Stupanje na snagu)

Ovaj zakon stupa na snagu osmog dana od dana objavljivanja u “Službenim novinama Zeničko-dobojskog kantona”.

Broj: 01-02-12948/17

Datum, 20.09.2017. godine

Z e n i c a

PREDSJEDAVALAČI

Jasmin Duvnjak, s.r.